

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- प्रधानमंत्री नरेन्द्र मोदी होर अज्ज नमीं दिल्ली च सोल लीडरशिप कनक्लेव दे पैहले संस्करण दा उद्घाटन करगन।
- मुख्यमंत्री उमर अब्दुल्ला होरें प्रदेश दे सारे जिलें थमां लोकें दे नुमायंदे कन्नै बजट थमां पैहले आली चर्चाएं गी संपन्न कीता।
- मुख्यमंत्री होरें जलवायु बदलाव सरबन्धी चुनौतिएं बारे जागरूकता पैदा करने पर जोर पाया। उन्हें जम्मू कश्मीर च पानी याबन्धी चुनौती गी बी उजागर कीता।
- सेहत मंत्री सकीना इत्तू होरें आखेआ जे सेहत सरबन्धी दिक्खभाल सरकार दी पैहली प्राथमिकता ऐ।
- जम्मू श्रीनगर राष्ट्रीय जरनैली शिड़क पर यातायात ब्हाल। यात्री गड्डिडएं दी दौनें भेठा दा आओजाई जारी।

<><><><><><>

PM Soul Conclave

प्रधानमंत्री नरेन्द्र मोदी होर कल यानि 21 फरवरी गी नमी दिल्ली दे भारत मंडपम च SOUL लीडरशिप कॉन्क्लेव दे पैहले संस्करण दा उद्घाटन करडन। भूटान दे प्रधानमंत्री दाशो शेरिंग तोबगे मुख् परौहने दे तौर पर मुख् भाषण देडन। दो दिन दा SOUL लीडरशिप कॉन्क्लेव इक प्रमुख मंच दे तौर पर कम्म करौग, जित्थे राजनीति, खेड, कला ते मीडिया, आध्यात्मिक दुनिया, सार्वजनिक नीति, व्यवसाय ते सामाजिक क्षेत्र जनेह बक्ख-बक्ख क्षेत्रें दे नेता अपनी प्रेरक जीवन यात्राएं दे तजुर्बे सांझे करडन। एहदे नै उंदिएं कामयाबिं, उपलब्धिं, नाकामिं-गलतिं सोयां सिक्खने दा मौका थ्होग ते कन्नै युवा दर्शकें गी प्रेरणा मिलौग। सोल लीडरशिप कनक्लेव सैह्योग ते विचार नेतृत्व गी बढ़ावा देना, युवा दर्शकें गी प्रेरित करोग। इस दरान महत्वै आलेजित्थें राजनीति, खेड, कला ते मीडिया, आध्यात्मिक दुनिया, नीति, कारोबार ते सामाजिक क्षेत्र दे नेता अपनी प्रेरक जीवन यात्राएं दे तजुर्बे गी सांझा करगन।

<><><><><><>

CM Pre Budget

मुख्यमंत्री उमर अब्दुल्ला होरें जम्मू कश्मीर दे सारे 20 जिलें थमां लोकें दे नुमायंदे कन्नै बजट थमां पैहले आली चर्चाएं गी मुकम्मल करी लैता ऐ। अपने खीरी सत्रें च उनें जम्मू आले सिविल सचिवालय च किश्तवाड़ ते डोडा जिले दे नुमायंदे कन्नै मलाटी कीती। इस दरान महत्वै आले मामले जियां शिक्षा ते सेहत सरबंधी दिक्खभाल लेई अमले दी कमी, शिड़क राबता बेहतर करना ते मोबाइल नेटवर्क दा विस्तार बगैरा शामिल गी पुट्टेआ गेआ। मुख्यमंत्री होरें भरोसा दोआया जे इनें सारे मामलें दा बजट च ध्यान रखेआ जाग। इस दरान मुख्य सचिव अटल डुल्लू हुंदे अलावा परिष्ठ अधिकारी बी मजूद हे। बजट थमां पैहले आली चर्चाएं बारे बोलदे होई मुख्यमंत्री होरें आखेआ.....

<><><><><><>

CM Climate

मुख्यमंत्री उमर अब्दुल्ला होरें आखेआ जे जम्मू कश्मीर जलवायु बदलाव करी गंभीर खतरे दा सामना करा'रदा ऐ, खास करी पानी दे संकट कन्नै। उनें आखेआ जे इस बारे लोकें गी जागरूक करना बड़ा जरूरी ऐ। एह गल्ल मुख्यमंत्री होरें जम्मू सूनिवर्सिटी च आयोजित त्रै रोजा कार्यशाला दरान आखी। नमीं शिक्षा नीति 2020 दी अमलावरी आस्तै नवाचार शिक्षा शास्त्र च क्षमता निर्माण पर त्रै रोजा कमीशन दा सरिस्ता जम्मू यूनिवर्सिटी च कीता गेआ। उनें आखेआ जे अपने लोकें गी जलवायु बदलाव बारे च जागरूक ते शिक्षित करने लेई लोड़चदे जतन नेई कीते जा'रदे न। मुख्यमंत्री होरें इस कार्यशाला दे उदघाटनी सत्र गी संबोधत कीता। उनें आखेआ जे बड़ी बड़ड़ी जिम्मेदारी सियासी नेताएं पर बी ऐ। इस मौके उनें यूनिवर्सिटी दे डिजाइन योर डिग्री गी बी उजागर कीता। एहदे राएं विद्यार्थिएं गी अपने भविक्ख गी बेहतर आकार देने लेई सशक्त बनाया जा'रदा ऐ।

<><><><><><>

CS-Jamboo Zoo

मुख्य सचिव अटल डुल्लू होरें जम्बू जू च सुविधाएं दे विस्तार आस्तै कीती जा'रदी पैहलकदमिं दा इक बैठक दी अध्यक्षता करदे होई जायजा लैता। मुख्य सचिव होरें इस दरान घोषणा कीती जे जू च जानवरें गी रखने लेई नमें बाडे, पक्षिं गी रखने आली नमीं थाहर ते सैलानिं लेई सुविधाएं च बेहतरी करने दी योजना ऐ। उनें आखेआ जे जू च तौले गै दरियाई घाड़ा, भारतीय गौर ते लाल पंडा जनेइं प्रजातिं गी आहन्नेआ जाग ते कन्नै कन्नै गै उत्थें बोटै निकल गार्डन ते डायनासोर पार्क बी बनाए जांगन। मुख्य सचिव होरें जोर दिंदे होई आखेआ जे जम्बू जू गी जंगली जीवेम दे संरक्षण ते पर्यावरण सरबंधी सैलसफा दी इक विश्प स्तरीय थाहर बनाया जाग।

<><><><><><>

प्रधानमंत्री नरेन्द्र मोदी होर म्हीने च इक बारी प्रसारत होने आले अपने रेडियो कार्यक्रम “मन की बात” इस बारी 23 फरवरी गी देश विदेश च रौहने आले श्रोताएं कन्नै बचार सांझे करगंन। हर म्हीने दे खीरले ऐतवार बडलै 11 बजे प्रसारत होने आले इस कार्यक्रम दी एह 119मीं किश्त होग। कार्यक्रम च शामिल करने लेई लोक अपने बचार ते सुझाह 21 तरीक तगर टोल फ्री नंबर 1800-11-7800 पर भेजी सकदे न। एहदे इलावा लोक अपने बचार My Gov ते नरेन्द्र मोदी ऐप पर बी भेजी सकदे न। एह कार्यक्रम आकाशवाणी ते दूरदर्शन दे समूलचे नेटवर्क दे इलावा न्यूज ऑन एयर मोबाइल ऐप पर बी उपलब्ध रौहग। एहदे कन्नो कन्नी एहदा सिद्धा प्रसारण ए.आई.आर न्यूज, डीडी न्यूज, प्रधानमंत्री हुंदे दफतर ते सूचना ते प्रसारण मंत्रालय दे यूट्यूब चैनलें पर बी कीता जाग। आकाशवाणी जम्मू पर मन की बात दे तुरत मगरा एहदा डोगरी च अनुवाद प्रसारत कीता जाग।

<><><><><><>

Sakina-Health

सेहत ते मैडिकल शिक्षा मंत्री सकीना इत्तू होरें जम्मू कश्मीर सरकार आस्सेआ विश्व स्तरीय सेहत सुविधा उपलब्ध करोआने आले धेइयै गी फही दोहराया ऐ। उनें लोकें दे घरें कश सेहत सुविधाएं दी उपलब्धता पर बी जोर पाया। एह गल्ल उनें जीएमसी अनंतनाग दे सहायक अस्पताल मिरजा मोहम्मद अफजल बेग मैमोरियल दे नमें तैआर ब्लाक—ए ते कैथ लैब दा उद्घाटन करने मगरा आक्खी। उनें मैडिकल ढांचे गी मजबूत करने पर जोर पाया। उनें डाक्टरें ते सरबंधी बमले पर इस गल्ला लेई जोर पाया जे ओह लोकें दे भरोसे गी बनाई रखन ते बेहतर सेहत सेवा उपलब्ध करोआने गी तरजीह देन। उनें जम्मू कश्मीर च सेहत सेवाएं च बाद्धा करने दी सरकार दी वचनबद्धता गी फही पक्का कीता। मीडिया कर्मिण कन्नै गल्ल करदे होई मंत्री होरें आखेआ.....

<><><><><><>

Div.Com Mela

जम्मू दे डिवीजनल कमीशनर रमेश कुमार होरें 25 फरवरी थमां शुरू होने आले महाशिवरात्रि शिवखोड़ी मेले दी तैआरिण दा जायजा लैने लेई इक बैठक दी अध्यक्षता कीती। डिवीजनल कमीशनर होरें जेहड़े कि श्री शिव खोड़ी श्राइन बोर्ड दे बी अध्यक्ष न, रियासी जिले च चलने आले त्रै दिनें दे इस मेले च पानी ते बिजली दी सप्लाई दे कन्नै कन्नै साफ सफाई, सुरक्षा, ट्रैफिक बवस्था ते सेहम सरबंधी सेवाएं उपपर व्यापक चर्चा कीती। बैठक दे दरान श्रद्धालुएं दे रश गी व्यवस्थित ढंगै कन्नै नियंत्रित करने आस्तै श्रद्धालुएं दे रजिस्ट्रेशन लेई इक मोबाइल ऐप दे इस्तेमाल दा प्रस्ताह रखेआ गेआ।

<><><><><><>

Saras Mela

भारत दी रूजी—पुज्जी दी सांस्कृतिक बन्न सबन्नता ते उद्यमी भावना दा जश्न मनांदे होई 10एं दिनें तगर चलने आले सारस आजीविका मेले दा जंदे रोज कला केन्द्र जम्मू च ग्रामीण विकास मैहकमे दे सचिव मोहम्मद एजाज असद होरें उद्घाटन कीता। कल थमां शुरू होए दे 1 मार्च तगर चलने आले इस मेले च 19 राज्यें दी ग्रामीण महिला उद्यमिण आस्सेआहत्थे कन्नै बने उत्पादें ते घरेलू व्यंजनें गी प्रदर्शित कीता जाग। मेले च जम्मू कश्मीर दी दस्मकारी ते सांस्कृतिक झलकिणें दा बी प्रदर्शन कीता जाग। मेले दा आयोलन जम्मू कश्मीर ग्रामीण आजीविका मिशन आस्सेआ कीता गेदा ऐ। इस आयोजन दे राणें आप सहायता समूहें गी सहायता प्रदान करना ते आत्मनिर्भरता गी बढ़ावा देना ऐ। ग्रामीण आजीविका मिशन दियां स्टेट प्रोजेक्ट मैनेजर अनीसा नबी होरें लोकें गी अपील कीती ऐ जे ओह आप सहायता समूहें गी प्रोत्साहत देन। उनें आखेआ.....

<><><><><><>

Traffic

जम्मू श्रीनगर राष्ट्रीय जरनैली शिड़क जेह्डी रामसू ते बनिहाल दरम्यान होई दी लगातार भारी बर्फबारी होने करी कल संजा थमां बंद ही, उसी गडिडणें दी आओजाई लेई अज्ज बउलै दौनें बक्खी दा खोली दित्ता गेआ ऐ। उआं अजें छड़ा यात्री गडिडणें गी गै छोड़ने दा ऐलान कीता गेआ ऐ। बड्डी गडिडणें दी आओजाई गी अजें अनुमति नेई दित्ती गेई ऐ। गौरतलब ऐ जे जम्मू श्रीनगर जरनैली शिड़क पर केई थाहरें पर तलैहट होने दे चलदे कल संजा गडिडणें दी आओजाई पर दौने बक्खियां रोक लाई दित्ती गेदी ही।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेह्दी उमर 24 थमां 50 ब'रें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 ब'रें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर—अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 07 मार्च 2025 थवां पैहले—पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>